

1467. In dem jar uff sant gallen tag wird ich, cunratt beck dreysig jar alt.

1469. an donstag vor purificationis marie virginis han ich cunrat beck mit Margarethen murerin von Sulgen hochzit gehebt.

1471. ann dem sechzehenden tag des mayen nachmittag zwischend dryen und vieren gelag Margarath irs ersten kinds, haisset endlin, und sind syne gättid, her heinrich otter Cunrad fischer und Endlin sylerlin. obiit 26 majus anno 79.

1472. an mittwoch nach sant bartholomeus tag ward gewicht die capell bey dem siechenhus in der ere sant jas sant cosmas und damians und sant katherinen, wirt kirwiche all wegen uff sonntag nest nach sant bartholomeus tag.

An sonntag frue um die vierden stant vor des heiligen crucztag ze herbst starb min liebe schwieger Margareth Murerin zu Sulgen, gott der almechtig sye ir sele gnädig alle zyt.

1473. ging ich, cunrad beck zu dem veren sant jas in der bykarthy, und was am pfingstag da.

Am sechzehenden tag des agsten (16. Aug.) ze nacht umb die zechne gelag min hussfruw grett zwayer kind, hissen grett und els, lebend zwo stunden und warend ire gättid dorothea binderin unser magt und die hebamm.

In dem jar was ain haisser summer und ward kurn und haber eingeschnitten vor unser frawentag assumptionis (15. Aug.) und ward alle frucht fru im jar zittig und galt ain mas lantwin der best jj dn. und sust jjj h.

1474. an dem aylften tag des mayen nach den zwelffen ze mittem tag glag das grettlin ains knaben, haist hans. und sind gättid der prediger hie zu mengen Johannes becker und Ulrich lullis frowen.

Uff die zitt lag der kaiser wyder den herzog von Burgunde zu köln mit fürsten, herren, stätten, und andern, und lag der herzog vor nüssen.

1477. an dem vier und zwaintzigesten tag januarii ipsa die thymothei apli. zwischend aylffen und zwelffen ze mittemtag glag min hussfraw grett ainer tochter, haisset ach grettlin und sind gättitt herr Ulrich luttfrid, herr mathe s zimerman und beth die pfrienerin im spittal.